

Des Liablingswort vo da Meier Sieglinde kimmt vom französischn „chaise“ fia „Kutschn“. Oide Schäs'n sogt ma heidzdog awa äha zu am rambboniadn Auto. Wenn ma ganz bäs waar, kunnndad ma des Wörtal „Auto“ aa durch Weiwaleid ersetz'n ...

Unsa Jubiläum, unsa Gwand

Sauwa, songma – und zwar glei dobbed! A sawans Jubiläum und a sawans Gwand. Am Buidl sehns d Kagerer Nadine (46) und ihran Mo, an Mengel

Joseph (53). De zwoa ghern zum Heimat- und Brauchtumsverein Lechler. Da Varein feiert jetz 25. Jubiläum (Gründungsaddum is da 30. März, as Fest is

am 18. Abrui im Hofbräukeller). Fian Varein ganz wichtig: de oide Münchner Tracht. Do erklärmas: HEI

Huad

Da Joseph hot do an Bierkutschahuad auf. D Nadine sogt: „Dee Art war domois im Mittlstand gängig. Hohe Herrn ham dageng meistens an Zylinda drong.“

Haum

D Nadine hot do a Riegghaum auf. In da erschn Häifdde vom 19. Jahrhundert, wo de Tracht ihran Ursprung hot, is koa vaheirade Frau ohne Haum ausm Haus ganga. Doher kimmt übrigs aa da Spruch, dass jemand undda da Haum is. Komboklzial is bloß as Aufsetzn und Eiflechn.

Kropfkettn

D Kropfkettn is a wichtige Bestandteil vom Schmuck. De hoaßt aso, wei d Leit friara tatsächlich äffdda an Kropf ghabt ham – und den hot ma mit aso a Kettn vadegga kenna. Da Schmuck, den de Lechler heidzdog hideoan, is zu am guadn Teil historisch aus da Originalzeit (zum Beispui auf da Duit kafft).

Miada

Und no mehra Schmuck! Am Miada ko de Frau bei da oidn Münchna Tracht zum Beispui Glücksbringa oda Gedenkmünzn herzoang. Do gibts vui Freiheitn, genau wie bei da Farbgebung vom Gwand. De Schnitte san dageng im Wesntlichn vorgem.

Abzeichn

D Lechler ham a eings Vareinswabbm. Omdrauf is a Krone. Mia ham ja schließlich an Kini ghabt in München ... Außadem sehng ma Rauddn und a Muiradl. Da Grund dafia is: Im Lechl san friara vui Muin gstanna.

Gnepf

A so a Gnopf an da Wesddn war net bloß zum Zuamacha do, sondan aa ois a Symbol. Wer si Münzgnepf hot hidoa kenna, der hot damit gsogt: I hob a Gäid! Drüba da Gehrock. Wichtig: D Hosn is net aus Leda, sondan aus Stoff. Wie bei de Höfischn.

Schnoinschuah

De Lechler drong koane Hafalschuah. Da Grund is aa do wieda, dass de Münchna a Nähe zum Hof ghabt ham – und do woidd ma net wiara Arbeidda ausschaung ...

